

Pemuda maut lori langgar belakang motosikal

ALOR SETAR 13 Mac —
Seorang pemuda maut selepas motosikal yang ditunggangnya dilanggar dari belakang oleh sebuah lori di Jalan Alor Setar-Sungai Petani berhampiran Simpang Empat, dekat sini, hari ini.

Jurucakap polis berkata, kejadian berlaku pada pukul 12.45 tengah hari ketika mangsa dalam perjalanan ke Sungai Petani.

Menurut polis, mangsa yang mati di tempat kejadian dikenali sebagai Norazham Mohd. Yusoff, 20, berasal dari Kampung Parit Gantung, Batu Pahat, Johor.

Rakan mangsa, Mohd. Hafiz Abd. Aziz, 21, yang membonceng motosikal hanya mengalami kecederaan ringan.

Hafiz ketika ditemui di tempat kejadian memberitahu, mereka berdua dalam perjalanan ke Sungai Petani selepas mengambil borang untuk memasuki Institut Agama Islam Negeri Kedah Darul Aman (Insaniah) di Mergong.

“Kejadian berlaku tiba-tiba sahaja apabila lori itu merempuh belakang motosikal,” katanya yang tercampak kira-kira 20 meter dalam kejadian itu.

Kemalangan itu katanya, menyebabkan Norazham terperosok dibawah lori dan meninggal dunia di tempat kejadian.

Pemandu lori yang dikenali sebagai S. Nagarajah, 25, yang tidak mengalami kecederaan.